

Extradicion:**Hamber pa puesto ta mas importante cu derecho di Arubianonan**

ORANJESTAD(AAN) Diabierna siman pasa pueblo di Aruba a haya e berdad duro y tristo presenta, ora cu e caso cu abogado nan di Randy Habibe a entama na ultimo momento pa asina trata di logra casacion y "Gobierno" di Aruba a nenga di duna Randy Habibe e derecho pa bay den "sprongcasatie".

Abogadonan di señor Habibe a cana tur caminda legal pa asina defende derechonan di nan cliente Habibe cu tabata riba lista pa worde extradita pa Merca.

Diabierna na ultimo momento ainda, prome cu señor Habibe a ser poni riba avion pa Merca, gobierno di Aruba tabata tin e oportunidad historico y real pa muestra pueblo cu tur loke nan a sinta bisa pueblo cu nan a traha duro pa logra, esta e mesun derecho di

casacion pa Arubianonan cu mester worde extradita, tabata posibel, pero nan a nenga categoricamente pa duna un Arubiano e derecho pa por bay den sprongcasatie mientras cu e caminda legal tabata habri y posibel.

Tur e discursonan bunita cu a ser presenta na pueblo, cu nan a traha duro pa logra casacion y cu nan tabata traha duro ainda pa por logra un ley di Reino a corto tempo pa Arubianonan tambe haya mescos cu Hulandesnan Europeo e derecho di bay den casacion si nan mester worde extradita, tabata nada otro cu un engaño traicionero.

Cu e hecho cu na ultimo momento un Arubiano para na aeropuerto tabata sperando cu gobierno di su pais por a dune e derecho pa bay den casacion y tog gobierno di Aruba a nenga sin ningun base cu por worde hustifica e derecho aki na un yiu di tera, un acto di traicion y entreguismo di marca mayor a worde cometi pa muestra e yiu di tera y tur otro, cu gobierno

di Aruba no ta respeta derechonan di Arubianonan.

Te cu diabierna ainda partido OLA por a bisa cu nan tabata na fabor di casacion, pero e hecho cu gobierno con demisionario cu e por ta, e ta keda un gobierno di AVP / OLA, a nenga di duna un Arubiano e derecho pa por haci uzo di sprongcasatie, a pone cu cualkier formacion entre OLA cu AVP ta muestra cu hamber pa puesto ministerial ta mas importante cu derecho di Arubianonan.

Bo no por bay sinta den un gobierno di cual bo ta bisa publicamente cu abo y bo gobierno lo bay lucha duro pa cambia ley di extradicion, pa asina duna Arubianonan tambe e derecho di haya casacion, anto bo mes ta acepta cu bo senior partner ta nenga di respeta e derecho di sprongcasatie y permiti na ultimo momento extradicion di un yiu di tera.

Manera cu e abogado nan di Randy Habibe a bisa, si Merca por a warda añanan largo pa por haya e caso di

Randy trata den Corte na Aruba, anto ta kico tabata pa nan warda 4 o 6 luna mas pa asina laga e Corte mas halto den Reino tuma un decision via sprongcasatie?

Ki pura gobierno di Aruba tabata tin y ki interes grandi tabata tin cu nan a nenga rotundamente pa duna Randy Habibe e oportunidad huridico, riba cual e tabata tin tur derecho, pa e busca su derecho cerca e corte mas halto den Reino?

Ta con Glenbert Croes y Lili Beke por bay hustifica awe cu nan ta bay sinta den un gobierno cu a nenga di duna un yiu di tera e derecho pa bay den casacion?

"Ta con bo ta bay sinta den un gobierno cu a muestra publicamente di ta pro extradicion sin derecho pa Arubianonan?", esaki tabata preguntanan cu pueblo tabata haci diabierna despues cu e caso den corte a caba di tuma lugar.

Extradicion di cualkier yiu di tera y no ta importa ken e ta, di unda e ta bin, di cua

famia, etc etc, no por worde hustifica door di ningun politico cu kier yama su mes un Arubiano cu ta goberna cu interes y derechonan di su hendenan den su curazon na cualkier momento y bao di cualkier circunstancia.

Si tabata tin cierto interesnan poderoso tras di cortina cu a pone cu un yiu di tera mester a worde sacrifica anto awe pueblo mester haya sa esaki!

Pueblo a haya sa e berdad y pueblo sa awor ta ken ta esnan cu ta para tras di extradicion di Arubianonan mientras cu no tin igualdad y e ley di Reino cu nan ta gaña pueblo cune, nan por bien lubida di sigui traha riba dje pasobra diabierna ultimo nan mascara a cay y e berdad ta haci dolor y pueblo no lo lubida esaki.

Awe ainda Glenbert y Lili por muestra pueblo cu nan ta contra extradicion sin derecho riba casacion y cu nan no tabata di acuerdo cu Randy Habibe a ser nenga di haya posibilidad pa bay den casacion.